

Pemarak sumbang bakti kepada komuniti

PERSATUAN Mahasiswa Anak Perak, Universiti Putra Malaysia (UPM) tampil dengan menceriakan serta menyumbang bakti kepada golongan gelandangan dan kanak-kanak cacat di Perak menerusi program Pemarak Back To Community 1.0 (PeBaCo 1.0).

Program ini mendapat sokongan serta kerjasama daripada Yayasan Kebajikan Negeri (Zon Utara), Pusat Gelandangan Anjung Singgah Ipoh dan Rumah Kebajikan Kanak-kanak Cacat Batu Gajah.

Pengerusi Program, Ahmad Zaid Ismail berkata, pada hari pertama, pihaknya mendekati golongan gelandangan selain bersama-sama bergotong-royong membersihkan kawasan serta melakukan pemeriksaan kesihatan oleh ahli sukarelawan yang terdiri daripada mahasiswa perubatan dan jururawat.

Menurutnya, pada hari kedua, pihaknya meneruskan program di Rumah Kebajikan Kanak-Kanak Cacat Batu Gajah.

Pihaknya beramah-mesra bersama-sama penghuni Rumah kebajikan Kanak-Kanak Batu Gajah selain melakukan gotong-royong di sekitar kawasan itu.

"Malah kehadiran kami juga memberikan sinar kegembiraan kepada penghuni rumah kebajikan itu apabila seronok dapat melakukan aktiviti bersama-sama para sukarelawan. Ini kerana ada daripada penghuni merasakan mereka ini tersisih daripada masyarakat.

"Menerusi program PeBaCo 1.0 ini, semua sukarewalan yang terlibat dapat belajar pelbagai perkara yang berguna untuk pembangunan diri dan sahsiah serta mampu menyumbang kepada komuniti," katanya.

Sementara itu, Pengurus Anjung Singgah Ipoh, Rohaizad Wahab berkata, program-program kebajikan seperti ini perlu diteruskan lagi pada masa akan datang.



Mahasiswa yang mewakili Persatuan Mahasiswa Anak Perak, UPM yang menyertai program.